

Powšitkowne WOZJEWJENJA

njedźelu, 22. januara 2023

Wusyłanje Božeje mše

Serbskorěčnu Božu mšu móža wěriwi tutu njedźelu, 22. januara, w 9 hodź. znova jako livestream z Chrósćić scěhować. Link na nju je w interneće pod www.posol.de kaž tež na wosadnej stronje podaty.

Modlenje w Róžeńće

Na modlenje swjateho różowca a před Najswjećišim su wěriwi sobotu, 4. februara, we 18 hodź. do Róžeńčanskeje hnadowneje cyrkwy přeprošeni. Pačerje budu serbsce a němsce spěwane.

Boža mša w Radworju

Na Božu mšu na wopomnjenskim dnju a 80. posmjertninach zbóžneho martrarja Alojsa Andrickeho su wěriwi pjatk, 3. februara, we 18.30 hodź. do Radworja přeprošeni. Předar budže pater Joachim Wernersbach. Kemše wobrubu chór Bratrowstwa.

Zhromadny dzeń za 1. a 2. lětnik

Pod hesłom „Pój, wjesel sol!“ přeprošuje Dekanatne dušepastyrstwo za džěci šulerjow 1. a 2. lětnika na zhromadny dzeń do Don Boskoweho domu we Worklecach, kotryž wotměje so wutoru, 14. februara, wot 9 do 15 hodź. Zajimcy měli so hač do njedźele, 5. februara, online přizjewić. Link k tomu je pod www.posol.de wozjewjeny. Za wudawki dnja zběraja wot kóždého wobdźelnika přinošk pjeć eurow.

Serbske kemše w Drježdžanach

Drježdžanscy Serbja su na maćernorěčnu Božu mšu njedźelu, 12. februara, w 16 hodź. do cyrkwy swjateho Antonija na Bünauskej 10 přeprošeni. Kemše budže farar Gabriš Nawka swjećić. Přizamknje so bjesada.

Na swětowe zetkanje młodžiny do Lissabona

Drježdžansko-Mišnjanske biskopstwo přeprošuje młodostnych a młodych dorosćenych wot 16 do 35 lět na swětowe zetkanje młodžiny do Lissabona dojeć. Jězba wotměje so wot pónđzele, 24. julija, do wutory, 8. awgusta 2023. Serbska skupina budže džěl diecezanskeje skupiny. Přizjewjenja přijimuja online hač do tuteje njedźele, 22. januara. Link k tomu kaž tež k nadrobnišim informacijam stej pod www.posol.de podatej.

Chorych a mrějacych přewodžeć nawuknyć

Ambulantna hospicna služba Hornjołužiskeho zwjazka Carity z.t. w Kamjencu poskićuje lětsa zaso kurs k čestnohamtskemu přewodženju ćežkochorych a mrějacych. K tomu trěbnu wědu posrědkuje w zakładnym kursu, kotryž wotměje so wot 1. měrcy hač do 1. apryla trójce srjedu wot 17 do 20 hodź. a trójce sobotu wot 9 do 15 hodź. Na to scěhuje dohromady 40hodžinski praktikum z dalšimi štyrjomi zetkanjemi. Pohlubšacy kurs je w septembri planowany. Štóż chcył wukubłanje absolwować, měł so pola hospicnej služby Carity w Kamjencu pod telefonowym čisłom (0 35 78) 37 43 12 abo z mejlku na hospiz@caritas-oberlausitz.de přizjewić. Link k nadrobnym informacijam je pod www.posol.de wozjewjeny.

Mandželski seminar

Klětu wotměja so w Smochčanskim kubłanišću swjateho Bena zaso tři seminary k přiho-
tej na sakrament mandželstwa. Přeni budže wot pjatka do soboty, 3. do 4. měrca. Přizje-
wjenja přijimuju hač do srjedy, 25. januara 2023, online. Link je pod www.posol.de podaty.

Podpěra załožby dale móžna

Budyski Ekumeniski tachantski wobchod chce tež w přichodže socialnu załožbu
„St. Wolodymyr Fonds“ katolskeje cyrkwe w ukrajskim Lwiwje podpěrać. Tam su
hižo w oktobru a decembru předewšěm medikamenty, milinowe agregaty a spanske
měchi pósłali. Štóž chcył załožbu podpěrać, móže swój pjenježny dar na konto ta-
chantskeho wobchoda DE33 8509 0000 5626 2110 05 přepokazać, a to pod hesłom
„Stiftung Lemberg“.